


For di e hoki aki bo ta saca bo ticket di parking



ORANJESTAD (AAN): Tanto riba Diamars como Diarazon, DIARIO a ricibi reclamo di varios hende cu nan no ta haya e ticket di mashin di parking, despues di a caba di paga pa esaki.

Un automobilista a indica cu e sistema nobo ta tiki complicado pa hendenan, y awor peor nan no ta mira e ticket ta sali for di e mashin despues cu bo a caba di haci pago.


E hecho ta cu e ticket ta sali bon imprimi, pero abo cu a caba di paga, bo tin di hisa e

tapa aki cu bo dedenan, y e ora bo ta sinti e ticket paden cu a caba di sali. E tapa aki kizas ta pa proteha e impresor di ticket.

Pues despues cu bo a caba di haci pago, corda pa bo hinca bo dede den e pida aki (mustra cu flecha), pasobra e tapadera aki ta spring-loaded y tras di dje bo ta haya e ticket. Djis gare cu dos dede y bin cune pafu.

Corda cu bo mester tin bo ticket como bo prueba di pago.

Puerto Rico ta bisa cu 'rides' cu Quadracers riba caminda publico ta ilegal



SAN JUAN: Ya caba tres caso di accident fatal a keda registra durante eventonan cu ta ser yama "corridos masivas", cu ta basicamente un dia di coremento rond riba caya cu vehiculonan ATV, yama tambe "Quadracers". Y awor Polis na Puerto Rico ta kere cu tin di stop cu esaki.

E tipo di 'rides' aki ta wordo organiza pa personan popular na Puerto Rico, manera e.o. 'Rey Charlie' y tambe 'Mezclita', y Polis a bisa cu esakinan lo no wordo acepta

mas. Pasobra nunca e eventonan ey a wordo coordina cu Polis, y pues nan no ta conta cu reglanan di seguridad den caso di un accident.

Y loke mas bien e rides aki ta causa, ta molester enorme pa automobilistanan, y e desordo ta crea hopi iritacion den publico. Lo mas fastioso ta cu mayoria di esnan coriendo ta hopi e Quadracers, y asina ta haci 'wheelies' cu ta haci e situacion aun mas fastioso y peligroso. Polis a bisa cu e actonan ilegal aki por ta doloroso si acaso e finaliza den accident. Pero a adverti tambe cu esnan cu wordo gara, por haya boet di entre \$500 te cu \$2.000 y bo por hasta wordo encarcela si bo causa un accident cu a laga hende herida of persona morto.

Reaccion

Museologo Lilly Peterson no ta para tras di Capitulo 19 di buki Evert Bongers

Part 1 — Skirbi pa: Lilly Peterson

Museologo Lilly Peterson no ta para tras di capitulo 19 di e buki di señor Evert Bongers

E buki Goudkoorts en geschiedenis van Aruba di Evert Bongers a keda publica na december 2022. Den e buki aki ta referi na un estudio científico di Lilly Marlene Peterson, museologo, como referencia, fuente di informacion, pa henter capitulo 19. Sinembargo, cu e articulo aki señora Peterson kier laga sa, cu e no por para tras di locual tin skirbi den capitulo 19 y cu e no tin nada di haci cu e buki concerni. Señora Peterson tampoco no por para tras di e articulo den corant cu e nomber "Uncle Louis Store in eigen glorie hersteld, bou di e capitulo Hier en nu di e corant Amigoe.

Cu su cincuenta y ocho aña Lilly Marlene Peterson a bay Hulanda pa studia museologia na e academia mas renombra den mundo pa museologia, esta Reinwardt Academie na Amsterdam. Dos aña despues y conforme e programa señora Peterson a ricibi su diploma. E ta prepara pa duna consejo strategico na nivel internacional.

Cu su propio placa - loke el a spaar pa e por uza pa su pensioen - señora Peterson a paga su estudio pa bira museologo. E academia no ta haya subsidio di Gobierno Hulandes pa e estudio di museologia cu ta na nivel di masters, manera si ta pasa cu hopi otro estudio. Debi na su edad señora Peterson tampoco no por a pidi pa un beurs.

Masha orguyoso cu e tabata cu su logro na e edad di sesenta aña y cu cartera bashi señora Peterson a acudi na Monumentenfonds pa wak si e por haya un tarea di investigacion, pa aplica su conocimiento nobo y pa mantene su mes. Señora Witsenburg, director di Monumentenfonds, a ofrec'e un contract pa haci investigacion riba Uncle Louis Store pa nan haya informacion cu nan por pone riba nan propio website cu no tin un meta comercial.

Como mucha di diescuater aña señora Peterson tabata cumpra tela na su tienda favorito cu ta Uncle Louis Store pa cose paña pa su mes, su famia y su amigonan. Señora Peterson a considera e negoshi aki un imperio di tela pa motibo di e gran variedad di tela cu bo por a scohe. Hende di diferente parti di Aruba tabata cumpra nan tela na e tienda aki. Hende tabata asta bin di Corsou y Venezuela pa compra tela na Uncle Louis Store na San Nicolas. Te dia di awe tin hende cu tin paña cu nan a cose of laga cose di tela di Uncle Louis Store.

Un tarea mas cerca di su curason no tin y señora Peterson no por a imagina nunca cu e lo ta asina afortunado di ta e persona cu lo haci e investigacion riba edificio bunita di Leon Wacjberg y e famia interesante aki. Un miho cumienso di su carera museologica no tabatin pa señora Peterson. Y pa haci e experiencia mas sublime ainda: e edificio a ricibi e Pieter van Vollenhoven

prijs den aña 2022. Uncle Louis Store ta e prome edificio pafu di Hulanda cu a ricibi e premio special aki.

Determina pa cumpli cu e tarea cu lo lanza su carera como museologo y investigador di historia intangibel y historia oral señora Peterson a hinca hopi tempo den dje y a haci tur cu tabata posibel pa haya e informacion cu ta duna un bon bista di Uncle Louis Store y di e famia y trahadonan di e negoshi aki. Por ehempel, señora Peterson a traha incansablemente pa haya sa ki tempo a construi e edificio. El a haya un articulo den corant indicando cu señor Wacjberg a cana di e edificio bieu pa e edificio nobo di Uncle Louis Store. E mester a djis crusa caya. Basa riba historia oral y cu e articulo por a determina pa e prome biaha ki tempo a construi Uncle Louis Store.

Di tur e medianan di comunicacion, esta television, radio y corant, e medio mas confia den mundo ta e medio di museo. Y pa e museologo no perde confiansa di hende, e presion riba tur museologo pa bin cu informacion completamente confiabel ta hopi halto. Pa confirma locual e museologo a colecciona

por ehempel den un combersacion cu por wordo considera historia oral, ta uza fuente di diferente forma pa confirma e informacion y pa segura cu e informacion ta corecto. Por ehempel, informacion duna oralmente mester keda confirma pa por lo menos dos hende y documentacion original y preferibel no buki. No buki pasobra manera hopi biaha nos ta mira na Aruba cu un escritor ta ripiti cos di un otro escritor, sin cu el a verifica si esaki ta berdad si of no. Asina nos historia ta wordo troci.

E trabou di un museologo ta sumamente dificil, pasobra no e informacion so ta di importancia, sino tambe e palabranan cu ta uza pa describi algo. Cambio di palabra den un storia por crea henteramente un otro storia y asina informacion cardinal por bay perdi. Banda di esaki e museologo mester ta hopi critico riba su mesun pensamiento y e mester ta consciente di su propio opinion. Esaki no mag di wordo refleja den su trabou investigativo.

Na otro banda, un escritor por skirbi loke e kier. Sinembargo, un escritor no ta liber pa skirbi con cu e kier, ora di uza informacion di otro hende. Tin regla con pa referi na informacion di e fuentenan uza. Si e escritor no aplica e reglanan aki, e ta comete un acto di fraude cu ta castigabel den corte. Si e escritor uza informacion pa locual e tin cu pidi permiso y e no a haci esey, tambe e ta cometiendo un acto castigabel den corte, esta plagio. Si un escritor uza informacion colecciona pa un motibo y ta uza e informacion ey pa un otro motibo, esaki tambe ta fraude y ta castigabel den corte. Y si bo persona uza informacion skirbi den buki di otro cu no tin e permiso adecua of cu no a aplica e reglanan segun ley, bo persona tambe ta comete fraude y ta castigabel den corte.